

Meisas cun rodas e sutgas verdas

Swiss Education Days a Berna – emprer premi va a Glion

■ (anr/abc) Gliendisgis ha la scola da Glion retschert visetas da Thalwil. Il menader dalla scola, Silvio Dietrich, ei staus il november vargau all'exposiziun svizra da material da scola, la Swiss Education Days a Berna. Tiel stan dalla firma da tablas e mobiliar da scola ha el gudignau igl emprer premi. Sin Nadal ha il scalem superiuor dalla scola da Glion retschert in bi regal. Thomas Hunziker, commember dalla direziun e conpossessur dalla firma cul medem num, ei viagiava persunalmeins da Thalwil a Glion per surdar quel. Il schenghetg consista da 25 sutgas e 25 meisas da scola, e quei ha el saviu surdar al menader dalla scola da Glion, Silvio Dietrich. Lez fuvu staus all'exposiziun naziunala da didactica a Berna. Quella ha giu liug dils 8 tochen ils 11 da november 2016 per l'emprema gada a Berna sut il num niev «Swiss & World Education Days». Plirs decennis haveva la medema exposiziun giu liug a Basilea cul num «Didacta». Varga 12 000 visitadras e visitaders han ils organisaturs registrau el liug niev. Silvio Dietrich fuvu viagiava a Berna en sia funcziun sco commember da suprastonza dall'Uniuon grischuna dils meinascola.

Nuot ei pli fix e franc

Ellas hallas dalla Swiss Education Days ei Dietrich ius – sco mellis auters era – da stan tier stan per s'informar dallas novaziuns en tuttas spartas dalla didactica. Denter auter ei era la firma Hunziker da Thalwil stada presenta. En Svizra eis ella la pli gronda producenta da tablas, si-



Las meisas e sutgas novas ein moviblas e selaian cumbinar tier rudials, retschas ni gruppas. Davos ils scolars il meinascola Silvio Dietrich, las scolastas Petra Derungs ed Astrid Rudaz, ensemen cun Thomas Hunziker ed ulteriurs representants dalla firma. FOTO A. BEELI

stems da pender si cartas e cundrezs da projectar. L'interpresa speciala exista dapi 1876 e vegn menada oz ella tschunavla generaziun da Thomas Hunziker, siu frar Christoph e la cusrina Nicole Giezendanner. Tut tgi ch'ei staus zacu a scola ei vengniu en contact cun material da quella firma. Hunziker enconuschan scolastas e scolasts buca mo pervia dallas tablas e cundrezs da presentar. Mobiliar per la

stanza d'instrucziun, pults, meisas e sutgas s'audan medemameins tiel sortiment.

La scola moderna ei sesviluppada ils davos onns. Aschia dat ei strusch pli ina stanza da scola cun mobiliar static e nimmovibel. Las cuntradras d'emprer cun canapè, cantuns cumadeivels, plaz avunda e plumatschs s'audan tiel standard d'ina stanza da scola moderna. Lu dues-

sen era pults, sutgas e scaffas buca esser memia pesonts, pertgei quei material duess ins saver midar tenor basegns e fuorma d'instrucziun.

Premi ella valeta da 15 000 francs

En stanza da classe ei ozilgi nuot pli fix e franc per generaziuns, trasora dat ei midadas. Il plan d'instrucziun giavischa buca mo scolasts e scolars movibels. Sch'ei

dat midadas da lecziuns e metodas ein pults grevs e sutgas da lenn cun peis d'itschal buca ideal. Pilpli ston ins saver reagir spert cun disponer ed adattare il mobiliar. All'exposiziun «Swiss & World Education Days» a Berna ei quella tendenza stada d'observar dapertut. Scolars e scolasts dueien saver tschappar meisas e sutgas e transformar la stanza enteifer paucas minutas. Per ina lavur en gruppas, pintgas ni grondas, per lavur singula ni disposiziuns spontanias drova ei meisas che selaian stuschar spert.

Co quei funcziuna ha ina classe dil scalem superiuor dalla scola da Glion mussau gliendisgis suentermiezgi. All'exposiziun a Berna ha Dietrich gudignau igl emprer premi ord ina concorrenza da trer la sort tiel stan dalla firma Hunziker. La carta cun siu num haveva la diavla da cletg tratg ora d'ina massa da cartas che sesanflavan ell'urna. Il meinascola da Glion ha gudignau 25 meisas e 25 sutgas dil sistem Shift+ ella valeta da 15 000 francs. Gliendisgis suentermiezgi ha Thomas Hunziker purtau il premi persunalmeins a Glion. D'ina camiunetta han ils scolars stuscha las mobilies reschnovas tras il zuler dalla scola ella stanza dallas scolastas Petra Derungs ed Astrid Rudaz. Mintga meisa peisa mo 12 kilos. Buca schi grev, cumparegliau cun pults da scola convenziunals. Las meisas cun plat rodond e fuorma concav-convexa han mintgamai duas combas cun rodas. Ins sa midar, cumbinar tier rudials, retschas ni gruppas. Las sutgas verdas vitier fan ina pareta frestga, era ellas selaian muentar cul regulatur.